
Title	Tentang: Kata singkatan
Author(s)	Muhammad Ariff bin Ahmad

Copyright © 1992 Muhammad Ariff bin Ahmad

Haji Muhammad Ariff Ahmad

Sari Bahasa

SBC Warna 94.2 92037

Jun 06 1992

tentang: kata singkatan

Seperti yang telah diterangkan kelmarin, singkatan dan akronim adalah merupakan kependekan dari suatu frasa. Selain daripada berlaku kepada frasa, singkatan berlaku juga pada kekata; padahal *akronim* hanya berlaku kepada frasa sahaja. *Akronim* dibaca atau disebut menurut sebagaimana ia dieja sedangkan singkatan dibaca dengan menyebut hurufnya.

KGMS dibaca ke-ji-em-es, PGBM dibaca pi-ji-bi-em. LBKM bagi *Lembaga Biasiswa Kenangan Maulud*, dibaca el-bi-ke-em, PKMS bagi *Persatuan Kebangsaan Melayu Singapura* disebut pi-ke-em-es dan lain-lain yang sebagainya.

Ada pula singkatan yang lebih popular disebut sebagaimana singkatan Inggerisnya. Singkatan bagi *Lembaga Kemudahan Awam* misalnya, sepatutnya disebut el-ke-eh (LKA) tetapi tidak ada orang yang tahu jika kita sebut LKA. Singkatan yang umum digunakan orang bagi *Lembaga Kemudahan Awam* itu ialah PUB [baca pi-yu-bi, jangan baca pub] iaitu singkatan Inggeris bagi *Public Utilities Board*.

Sebuah persatuan karyawan yang bernama Angkatan Karyawan Islam, kalau suka ia boleh disebut pendek sebagai akronim aki atau sebagai singkatan eh-ke-ai. Bagaimanapun, anggota-anggota persatuan itu lebih suka bahawa persatuannya disebut dengan singkatan AMP (eh-em-pi) iaitu singkatan bagi frasa Inggeris *Assosian of Muslim Professional*.

Dalam pada itu, ada keunikan pada kependekan kata LARAS. Jika berdasarkan ciri-ciri yang telah dikemukakan ia boleh merupakan suatu akronim, dan dapat pula kekata itu dikatakan suatu singkatan. LARAS yang ditulis dengan semua huruf besar itu ialah nama singkat bagi *Jawatankuasa Penyelaras Masjid-masjid Baru* dalam tahun-tahun 80-an.

Bagaimanapun, kekata LARAS itu mungkin pula dapat digolongkan ke dalam lingkungan kata yang disebut *pars-pro-toto*, iaitu dengan menyebut kata LARAS sahaja terserlah segala yang berkenaan dengan *Jawatankuasa Penyelaras Masjid-masjid Baru* itu.

sekian dahulu.